

ALABADO EN MEXICANO,

Que contiene los principales Misterios de
nuestra Santa Fe, compuesto por el Br.
D. José de la Mota, Cura que fué y Juez
Eclesiástico en los Partidos de Tepecoa-
cuilco, Real y Minas de Zaqualpam, y
actual en la Provincia de la Sierra Alta de
Tlanchinol, Comisario del Santo Oficio
de la Inquisicion &c.

MA cenca yectenehualo
Yn Cenquizca Yeitiliztli
Santisima Trinidad
Ce teotl, ca ahmo miecquintin.
Ytech Yeitiliztli oncatqui
Dios Tetatzin, Dios Ypiltzin,
No in Dios Espiritu Santo:
Yei Personas; ce Teotzintli.
Nelli Teotl in Tetatzin,
Nelli Teotl in Ypiltzin,
Nélli Espiritu Santo Teotl;
Zan ce teotl, in imeixtin.
Zan Ynic ome Persona
Tonacayo oquimocuili:
Ynic yuhqui in huel tlaihyohuiz,
Yhuan techmomaquixtiliz.

Teotl, Oquichtzintli omochiuh,
Ychpochxillan Cihuapilli
Sancta Maria in cemicac
Huel chipahuac Yepochtzintli.
Oeno Ychpochtli, Yteoconetzin
Oquimotlacatilili:
Ca huei tlamahuizoltica,
Omochiuh cemixquich inin.
Auh inye yuh Toquichpotzin
Omochiuh in Dios Ypiltzin,
Jesus itoca, ihuan catqui
Nelli Téotl, nelli Oquichtli.
Jesus Oquichtli, no Téotl
Ca onca itic Teotlaxcaltzintli
Santisimo Sacramento,
Yn yuh onca Ylhuicatl itic.
Aquin qualli tlacellia,
Yn cemicac monemitiz;
Ahmo qualli tlaceliani,
Mochipa cemicac miquiz.
Ma Ytlacachihualocatzin
Tenyotilo in Cihuapilli
Maria, ca aic itech oacic
Tlatlacolcatzahualiztli.
Ma tenyotilo in San Joseph,
Yn oquimohuapahuili,
No ihuan oquimonapalhui,
Ymaetzinco, in Teopiltzintli.



No in Santa Cruz tenyotilo:z
Ca itechtzinco omomiquili
Jesu-Christo, in ye topampa,
Huel cenca omotlaihyohuilti.

Yquac tlamiz Cemanahuac,
Jesu-Christo hualmehuitiz,
Ynic in mochtin tlaca
Quimmotlatzontequililiz.

Yn cemicac quintlamachtiz
Yn qualtin Ylhuicatl itic;
No mochipa in ahmo qualtin,
Yn Mictlan, quintlatzacuiltiz.

Nicneltoca in Noteotzin
No in ixquich ineltilitzin:
Yn itech ninotemachiz:
Ycel nicnotlazotiliz.


Mopaltzinco Jesuse,
Ma nelti in notlaehuiliz,
Ma motlantzinco ninemi
Ma mohuantzinco nimiqui.

Ma in mochihua Jesuse
Mariae xichmochihuili
Amomactzinco niccahua
No nemiliz, nomiquiliz.

Jesus, Maria, Joseph
Ma cemicac Yeintintzitzin
Joseph, Maria, Jesus,
Meztiyecan toyollo itic.

BA809
M9176

99-10
Los Illmôs. y Rmôs. Señores Dr. D. Manuel Rubio y Salinas, Arzobispo de México: el Mrô. D. Fr. Francisco de Pallas, Obispo de Sinopoli y Vicario Apostólico de Fokten en el Imperio de China: D. Fr. Manuel Matos de la Concepcion, Obispo de Camarines: y los Illmôs. Señores Arzobispo, Obispo de la Puebla, y el Señor Obispo de Cisano conceden cada uno 40 dias de Indulgencia á todas las personas por cada vez que cantaren este Alabado.



Reimpreso en México en la Oficina de D. Mariano José de Zúñiga y Ontiveros, calle del Espíritu Santo, año de 1809.

